

Mussà cor per ils Rumantschs

Ina buna procentuala per vischnancas monolinguas rumantschas

DA CLAUDIA CADRUVI / ANR

■ Ina vischnanca cun 40 pertschient Rumantschs è ina vischnanca monolingua rumantscha. Quai ha il cussegl grond decidì ier. Oz discuttescha el vinavant davart la lescha da linguas. Matematicamain na saja quai betg gist, ma per la promoziun dal Rumantsch stoppian ins sa decider per il quorum da 40 pertschient, ha Margrit Darms (pcd) argumentà ier en il cussegl grond. «I va qua per il cor da questa lescha», ha Romedi Arquint (ps) ditg tar l'artitgel 16 che definescha cura ch'ina vischnanca è monolingua.

La cumissiun era da l'avis ch'ina vischnanca valia sco monolingua rumantscha sch'ella haja ina populaziun da 50 pertschient Rumantschs u dapli. Vitus Dermont (pcd) ha dentant purtà en il cussegl la proposta che già 40 pertschient Rumantschs duain esser sufficientes. Cunzunt vischnancas turisticas rumantschas, cun blers lavurers esters, ruschnian uschiglio svelt sut la limita da 50 pertschient e valian tuttenina sco vischnancas tudestg-rumantschas, ha Dermont



La debatta en il cussegl grond ha documentà che la maioritad tudestga da noss chantun ha demussà bler chapientscha per il rumantsch ed il talian.

FOTO P. DE JONG

argumentà. Il cussegl ha suandà la proposta Dermont cun 53 cunter 44 vuschs.

Oz discuttescha il cussegl grond davart ils ultims otg artitgels da la lescha da linguas. La le-

scha fixescha il principi territorial en il Grischun. Plinavant vegn prescrit tge lingua che las autoritads chantunalas, communalas e las dretgiras duain duvrar.

I va dentant era per aspects pli-

ost ideals. Ina da las finamiras da la lescha è che la chapientscha tranter las communitads linguisticas duai vegnir promovida.

➤ COMMENTARI E PAGINAS 2 E 3

■ COMMENTARI

Via pragmatica stagl fundamentalissem

DA MARTIN CABALZAR

*S*uenter quatter emprovas vanas èsi ussa finalmain reussì al Grischun da relaschar ina lescha da linguas. La lescha deliberada ier è in clar confess en favur da la trilinguitad. Ella porscha plinavant la basa legala necessaria per mantegnair e promover il rumantsch ed il talian e da sustegnair il rumantsch cun mesiras spezialas. Bain è il chantun daventà activ per sin squitsch da la Charta europeica da linguas e sin fundament da la Constituziun federala che pretenda dals chantuns plurilingvs mesiras concretas per mantegnair linguas pitschnas e periclitadas. Ord optica rumantscha è la nova lescha tuttina in essenzial pass enavant sin la via stentusa per contanscher in status giuridic adual a las autras linguas uffizialas.

*L*a debatta en il cussegl grond ha documentà che la maioritad tudestga da noss chantun demussa bler chapientscha per il rumantsch ed il talian. Presupponì che lur pretensiuns sajan raschunai-vlas e sa basian sin imaginaziuns realistics che corrispundan era als basegns effectivs dals pertutgads e betg pretensiuns fundamentalistics per amur da las pretensiuns. Era tutgi gugent ni nuidis prender enconuschientscha dal regress dal rumantsch. Betga adina èsi pussaivel da volver anavos la roda e reconquistar il terren pers. Soluziuns pragmaticas han chattà sustegn, ideas fundamentalistics èn vegnidas refusadas.

*A*quistar in status giuridic e francar il principi territorial è ina chausa, applitgar el in'otra. Mo cun il status giuridic ed in mantun leschas n'èsi betg fatg. Pli impurtant che leschas è dentant la famiglia, la scola, ils meds da massa e projects concrets da promoziun en las regiuns rumantschas. Uss èn ins Rumantschs sezs dumandads. Mo cun applitgar consequent il rumantsch en la veta da mintga di mantegn quel en l'avegnir sia funcziunalitad e ses dretg d'existenza.